

SCRIPT OF MORNING GOJRI NEWS BULLETIN 27JAN 2026

1015HRS

مارنگ گجری نیوز بولٹن 27 جنوری 2026

یوہ آکاشوانی جموں ہے محمد اکرم تیں خبر سُنو۔

LG TOURIST FOOTBALL

لیفٹیننٹ گورنر منوج سنہا نے کہیو ہے کہ جموں کشمیر نے پچھلے سال سیاحت غی بحالی گو ایک مضبوط مشاہدہ کیو ہے جس نال نومبر 2025 توڑی 1 عشاریہ 61 کروڑ تیں زیادہ سیاحاں گا دورہ ریکارڈ کیا گیا ہیں۔ اپریل مانہ پہلگام دہشت گردانہ حملہ تے اگست تے ستمیر غے دوران سیلاب غی وجہ تیں آن آلی مشکلات غے باوجود حکومت غی لگاتار کوششاں نے سیاحاں غے درمیان اعتماد بحال کرن مانہ مدد کی ہے۔ اُنہاں نے کہیو کہ نواں سیاحتی مقامات غی نشاندہی کی گئی ہے، تے اُن نانہ مرکزی حکومت گا تعاون سنگ تیار کیو جارہیو ہے۔ لیفٹیننٹ گورنر اس بارے جموں مانہ یوم جمہوریہ غی تقریبات غے دوران اجتماع نال خطاب کرتا واں کہ رپیا تھا بعد مانہ شام ویلے لیفٹیننٹ گورنر نے 77 واں یوم جمہوریہ گا موقعہ ور لوک بھون جموں ور استقبالیہ تقریب غو انعقاد کیو۔

DY CM STATEHOOD

نائیب وزیر اعلیٰ سریندر چودھری نے ایک بار پھر اُمید ظاہر کی ہے کہ جموں کشمیر ریاست گو درجو بحال کرن گو وعدو پورو کیو جے غو۔ گزشتہ روز زرائع ابلاغ نال گل بات کرتا واں، اُنہاں نے کہیو کہ مرکز گے زیر انتظام علاقہ گا لوک مرکزی حکومت گی طرفوں دتی گئی اس دیرینہ یقین دہانی نانہ پورہ کرن گو ہے صبری نال انتظار کر رہیا ہیں۔ اُنہاں نے مزید کہیو کہ ریاست غی بحالی عوام غی اُمیداں تے جزیات غی عکاسی کرے۔ تے اس نال خط مانہ جمہوریت تے انتظامیہ نانہ مضبوطی ملے غی، اُنہاں نے کہیو کہ جموں کشمیر حکومت اس وعدہ نانہ باآسانی پورا کرن واسطے سازگار ماحول پیدا کرن واسطے پُر عزم ہے، جد وی مرکز اس سلسلہ مانہ اگلو قدم چاوے گی۔

POETRY SYMPOSIUM

جموں کشمیر پُر ثقافت تے زبانان بارے اکیڈمی جموں گا ابھینو تھیٹر مانہ قومی سطح گا مشاعرہ گی محترک سیریز گی میزبانی کررئی ہے ترے روزہ ادبی تقریب گو آغاز اج ہندی کاوی سملین نال وے گو جس غے بعد کل کل ہندی اردو مشاعرو وے گو۔ یہ تقریبات 30 جنوری نانہ راشٹریہ ڈوگری شاعری سملین غے نال اختتام پزیر ویں گی۔ جس مانہ ملک پھر گا نامور شعورہ نانہ زبانان تے ثقافت گا منفرد امتزاج مانہ اکٹھو کیو جے غو۔

VANDE MATRAM

جموں کشمیر اطلاعات و عوامی روابط بارے ڈائریکٹوریٹ نے اپنا 2026 گا مضمون نویسی تے وندے ماترم گانہ گا مقابلہ گا فاتحین گو اعلان کیو ہے۔ مضمون نویسی گو مقابلو میرو آئین، میرو فخر، گا موضوع ور منعقد کیو گیو تھو جد کہ گانہ گا مقابلہ مانہہ حُب الوطنی، تے قوم غے تئیں عقیدت غی عکاسی کرن آلا وندے ماترم، گی پُر اثر پیشکش دیکھی گئیں۔ شرکاء اطلاعات محکمہ گی سرکاری سوشل میڈیا ہینڈل ایکس ور جیتن آلاں غی مکمل فہرست دیکھ سکیں۔ انتظامیہ نے تمام جیتن آلاں نانہہ مبارک باد پیش کی ہیں۔

SARAS MELA

سرس میلو 2026، جموں گا کلا کیندر مانہہ 31 جنوری تیں 9 فروری 2026 توڑی جاری رے غو، جہڑو گراں گو ہنر تے ثقافت نانہہ پیش کرے غویوہ 9 تہاڑہ غو میلو، ملک تیں دیہی خواتین کاروباریاں نانہہ اکٹھا کرے غو تے آن آلا زائرین نانہہ ایک منفرد موقعو فراہم کرے غوتے لوک ایک ہی جگہ ور بھارت غی دستکاری، رنگ تے روایات غو لطف چا سکیں گایوہ میلو، اپنی مدد آپ گروپ تے خواتین غی قیادت آلا کاروبار نانہہ فروغ دین واسطے منعقد کیو جارہیو ہے۔ میلا مانہہ روایتی دستکاری، ہتھ کڈی، مقامی کھان پین غی اشیاء تے ہتھ تیں بنی چیزاں غی نمائش لائی جے غی مختلف ریاستاں گا کاریگر اپنا علاقاں غی مخصوص دستکاری تے ثقافتی چیز پیش کریں گا۔

AVALANCHE WARNING

جموں کشمیر گا اچا پہاڑی علاقاں مانہہ ہوئی برف باری غے بعد متعلقہ عہدے داراں غی طرفوں 10 ضلعان مانہہ برفانی تودا کھسکن بارے خبر دار کیو ہے آئیندہ 12 گھنٹاں غے دوران جموں صوبہ گا ڈوڈہ، کشتواڑ، پونچھ، رام بن تے کشمیر صوبہ گا ضلع کپواڑہ، اننت ناگ، بانڈی پورہ، گلگام تے گاندربل واسطے عام لوکاں نانہہ برفانی توداں تیں خبردار رہن غی صلاح دتی گئی ہے۔ لوکاں نانہہ کہیو گیو ہے جے وے اس عرصہ غے دوران برفانی توداں آلا علاقاں مانہہ جان تیں گریز کریں لوک کسے وی ہنگامی صورت مانہہ 112 نمبر ڈائیل کرسکیں اس دوران خطہ مانہہ عام طور ور موسم آبرآلود رہن غے نال نال ہلکی تے درمیانہ درجہ غی بارش تے برف باری غو امکان ہے۔

TRAFFIC

نوویگ ٹنل تے اس گا کول کال گا علاقہ مانہہ تازہ برف باری غی وجہ نال دواں پاساں تیں قومی شاہراہ 44 ور گڈیاں غی نقل و حرکت روک دتی گئی ہے اس غے علاوہ مغل سڑک ایس ایس جی سڑک تے سنتھن سڑک وی تازہ برف اکٹھا ہون غی وجہ نال بند کردتی گئی ہے لوکاں نانہہ مشورو دتو گیو ہے کہ وے مزکورہ سڑکاں ور اس ویلے تک سفر نہ کریں جد تک یہ سڑک مکمل طور ور بحال تے آمدرفت واسطے محفوظ کرار نہ دتی جیں۔
